

9/10



NOSSE CVPIS FACILEM IVYPERA  
HANC CERNE TAPPELLAN SIME  
DEM LIPROS CONSVLECERT



✓ 00 f. 3

Acte Nr. 245.

1) Wigandus f. n. noch

3 Blätter

K. VII. 85.





**Ein kurzer vnd  
getrewer warnügs Brieff/  
an die fromen vnd recht Euan-  
gelischen Christen/ vnter dem leidie-  
gen Papstumb / das sie die reinen  
Euangelischen Bücher nicht sollen vberants  
worten/ ob mans gleich mit ernst von ihnen  
erfordert. Geschrieben / durch Thomam Kos-  
rarium/Pfarherr zu Reinartzhofen/in  
der Pfaltz/Anno Domini/  
1566.**

**Ecclesiastica Historia, Libro 8<sup>o</sup>  
Cap. 1.**

Es ist je vbel mit vns gestanden / da man  
vns die Kirchen bisß auff den Boden hat ab-  
gebrochen / vnd die Heilige Schrift mitten  
am Weg verbrend / wie wir das leider mit vns  
sern Augen gesehen haben/etc.

**Gedruckt zu Eisleben / durch  
Andream Petri.**

**M. D. LXVII.**



*[Faint, illegible text, likely bleed-through from the reverse side of the page.]*

*[Faint, illegible text, likely bleed-through from the reverse side of the page.]*

*[Faint, illegible text, likely bleed-through from the reverse side of the page.]*





# Anden Christ- lichen Leser.

**W**iewol ich für einer  
zeit einen Fall gethan/  
den ich nicht solt gethan  
haben / Darumb / das  
ich ein Land verschwor-  
ren / darin die Augspurgische Con-  
fession vnd reine Lehre keinen platz  
hat. Vnd dadurch bey dem einfelti-  
gen gemeinen Man / ein grosses Er-  
gernis gegeben / Also / das viel her-  
nach folgen / vnd nicht alleine Bep-  
stische örter (welchs gleichwol auch  
nicht recht / sintemalen es / so viel vns  
Prediger belangt / wider das Manda-  
tum Christi ist: Ite in Orbem vniuersum,  
Darumb das noch keiner weis / wo  
ihn Gott hinführen vnd beruffen  
möchte ) sondern das noch erger /  
Euangelische Stedt vnd Kirchen /  
verschweren / das sie daselbst hin

A ij      nims



An den Christlichen Leser.

nimmer gehen / Das ist / nach des  
Papsts Deutsch / zu keiner Christ-  
lichen versammlung / da reine Lehr vnd  
rechter gebrauch der Hochwirdi-  
gen Sacrament im schwang ist / nimmer  
komen wollen / welchs denn  
heist / wie Herr Wolffgang Wald-  
ner sagt vnd schreibt / Den Himel  
samt der erden verschweren / welchs  
freylich kein Apostel noch einiger  
rechtgeschaffner Christ / in der Er-  
sten Kirchen niemalen gethan / vnd  
noch itzt nicht solt gethan werden.  
Da es aber aus mēschlicher schwach-  
heit / oder vnuerstandt geschehen /  
wie es denn in Niedern Beyern  
gantz gemein vnd schier keine Sün-  
de mehr ist. Solt es durch einen  
ernstlichen Widerruff gebessert / vnd  
beide Gott vnd der geergerten Kir-  
chen vnuorzüglich abgebeten / vnd  
also forthin durch anruffung Gött-  
licher hülffe / durch aus verhütet /  
Vnd an die wort S. Augustini de  
verbis



An den Christlichen Leser.  
verbis Apostoli, Sermo 28. allezeit ge-  
dacht werden. Falsch schweren ist  
verdäulich / recht schweren ist ge-  
fährlich / gar nicht schweren ist am  
sichersten.

Vnd wie wol / das ich noch mehr  
sag / mir etliche hinterrücks falschlich  
zumessen / das ich zugleich reine Lere  
vnd das Predigamt solte verscho-  
ren haben / welchs freylich niemand /  
denn die verlogenen vnd verfuhris-  
chen Jesuwider von mir ausgehen /  
damit sie die leute / so in der Graff-  
schafft Ortenburg / oder sonst / nu  
mehr in die 20. Jahr reine Lehr  
von mir gehört / durch solch fürge-  
ben / gern wolten abfellig machen /  
vnangesehen / das es denen / so mir  
das gewaltsam Jurament dazumal  
haben aufferlegt / vnd doch seithero  
widerumb dauon absoluiret / selber  
bewust / das es von ihnen nicht  
begert ( aber gleichwol heimlich  
also gemeinet ) viel weniger von

A iij mir



An den Christlichen Leser.  
mir also geschehen ist. Der Herr  
von Himel wolle mich vnd andere  
noch weiter dafür behüten/ vnd alle  
Gefallenen widerbringen / vmb sei-  
nes heiligen Namens willen/ Amen.  
So hab ich doch nichts desto weni-  
ger/ in dieser nachgesetzte Busspres-  
digten/ nicht allein mich selbst / son-  
dern alle Christen zur beständigen  
Bekentnis reiner Lehr vnd rechten  
vnuerfelschten gebrauch der Hoch-  
würdigen Sacrament / ernstlich er-  
manen / vor Neucheley vnd abfall  
warnen/ sonderlich aber/ den Abge-  
fallen zu heilsamer Bus vnd warer  
bekerung / widerumb helffen wolle.  
Der Christlichen zuuersicht/ es wer-  
de ohne frucht nicht abgehen. Dazu  
gebe der Barmhertzige Gott sein  
Gnade vnd Gedeyen/ vmb seines  
lieben Sohns Ihesu Chris-  
ti willen/ Amen/  
AMEN.



# Allen Christ- lichen Leser.

**A**llen vnd jeden fro-  
men Christen / So hin  
vnd wider vnter dem  
Bapstumb zerstreuet /  
wünschet Thomas Rorarius von Gott  
dem Vater ware Erkenntnis vnd bes-  
ständige Erkenntnis / reiner vnvor-  
felschter Euangelischer Lehre / sampt  
aller zeitlichen vnd ewigen wolffart.

Lieben Herrn vnd in Christo 2. Cor. 7  
Brüder. Es spricht der Heilige  
Paulus: Vns ist nicht vnberuust /  
was der Sathan im Sinn hat. Das 1. Pet. 5  
ist / wir sehen von alters her / das er  
jederzeit / wie ein grimmiger Lewe  
vmbhergange vnd gesucht hat / ob er  
jemand durch Lügen vñ Mord / doch  
vnter dē schein des Göttlichē namēs /  
vñ in der gestalt eines Engels / möch-  
te verschlingen / vñ also das letzte er-  
ger

A iij ger



An den Christlichen Leser.  
ger machen / denn das erste gewesen /  
Denn also hat er in dieser letzten  
zeit / nicht allein schlechte Ketzer vnd  
Tyrannen erwecket / der etliche die-  
sen / die andern jenen Artickel des  
heiligen vnuorfelichten Glaubens  
angefochten / Vnd dadurch viel fro-  
mer einfeltiger Hertzen also irre ge-  
macht / das sie nicht gewust / was sie  
glauben / noch wie sie ihre Seelen /  
Leib / Ehr vnd Gut / für diesen Lüz-  
genern vnd Mördern / verwaren sol-  
len / Sondern auch / den Ketzer /  
vber alle Ketzer / Fridericum Staphylum  
Das er nicht etliche wenig Artickel  
in Gemein / Sondern die gantze  
Christliche Religion / auff einmal  
anfechten / vnd in grundt umbkieren  
vnd vertilgen solt. Denn er je mehr  
als einmal geschrieben vnd geraten /  
das die Leyen die Bibel / Das ist /  
die Schrifften der Propheten vnd  
Aposteln / nicht sollen lesen. Daraus  
denn folget / oder je bald folgen wür-  
de /



An den Christlichen Leser.

de/ das man die schönen herrlichen  
Bücher/ so bissher dem Gemeinen  
Man/ zu guter vnd heilsamer vnter-  
richt/ in Deutscher sprach außgan-  
gen/ nicht allein ernstlich verbieten/  
sondern auch/ Tyrannischer weise  
von ihnen erfordern/ vnd zu Puluer  
verbrennen solt/ wie denn an vielen  
Orten vielmalen geschehen/ vnd zu  
besorgen/ weiter geschehen werde.  
Der Herr wolle ihnen wehren/  
vmb seines heiligen Namens wil-  
len/ Amen.

So denn/ freundlicher lieber Les-  
ser/ dieser Gottloser Rath des ver-  
zweiffelten Staphyli/ den armen  
Christen nicht leidenlich/ vnd doch  
vielen einfeltigen Hertzen/ aus men-  
gel guter vnterricht/ nicht so viel ver-  
standes ist/ das sie wüsten/ wes sie  
sich als denn/ in erfordernung der  
Christlichen Bücher/ verhalten sol-  
ten. Dab ich diesen Brieff/ gleich  
als ein Lehr/ Warnung vnd Verma-  
nung/



An den Christlichen Leser.  
nung / an euch vnd alle / so meines  
einfeltigen Raths bedürffen / stellen  
vnd zudrücken verordnen wollen /  
Damit ihr hierinnen anderst nicht  
thut / denn wie ihr sehet vnd höret /  
das die Alten gethan haben. Der  
zuerst / ob es gleich nicht allen  
möchte gefallen / es werde dennoch on  
Nutz nicht abgehen / Amen / das ge-  
schehe. Actum Reinhartzhofen  
den 2. Januarij Anno  
1567.



Was



# W A R N U N G S

Brieff an die Christē vnter  
dem Papstumb / das sie ihre Euan-  
gelische Bücher / nicht sollen vber-  
antworten / Ob man sie gleich  
mit Ernst von ihnen  
erfordert.

**S** M Sechsten Buch  
Tripartitæ Historiæ am 27.  
Capit. Verstosset Julianus  
Apostata / der zeit Römischer Kenser / die  
Christlichen Priester / mit diesen Gottlos-  
sen Gedancken: Das er verhoffet / wenn  
die getrewen Kirchendiener hinweg sind /  
(welche die Heilige Schrifft Wechter  
vnd bellende Hunde nennet / Darumb das  
sie vber ihre Herde getrewlich wachen /  
für allem Irthumb vnd Unfal warnen /  
vnd die Keher vnd reissende Wolffe / ge-  
trost vnd vnerschrocken anschreyen / Vnd  
nicht zugeben sollen / das sie den Wein-  
berg des HERN verwüsten / vnd die  
Scheff:



Prover-  
bior. 29.

Schafflein Christi zerstreuen) So werde (wie denn auch geschah) der rechtgeschaffnen Religion bald vergessen werden. Denn so spricht die heilige schrift: Wenn die Prophecy (Das ist/ das liebe Predigamt/ durch welches Gott mit uns redet/ vnd seinen Willen offenbaret) auffhöret / so würde das Volk wüste vnd wilde.

Vnd zuvor am 17. Cap. desselben Buchs/ lesen wir/ wie gedachter Julianus den Christen verbeut/ Das sie nicht sollen lesen in den Büchern der Poeten/ vnd Philosophen / Vnd das man keine Galileer ( also nennet er die Christen ) zu einigem Dienst vnd Ampt / solte gebrauchen/ Das doch der grosse Heidnisch Keyser Nebucadnezar zu Babylonien nicht gethan/ welcher den Gefangen Danielen vnd seine Gesellen/ zu Landudgten gesetzt/ vnd wol verstanden hat/ die grosse Weisheit/ die ihnen Gott für andern/ zu Gemeinem Nutz / gegeben hat. Daniel am 2. Denn sie wappen vnd rüsten sich/ aus dem schreiben der vnsern/ vnd Kriegen wider uns.

Item/



Item/ in dem Keyserischen Mandat/  
zu Brüssel im Niderlande Anno 1540.  
ausgangen. / Ist ein seer lang Register/  
von den Sophisten zu Löwen gestellt/  
Das man sich aller derer Bücher enthal-  
ten solt/ so sich zu Luthero bekennen/ auch  
der Deutschen Testament/ Vnd das nie-  
mand von der heiligen schrift reden/ oder  
disputiren solt / Er habe denn Erleubnis  
von einer Namhafften Bepflichten Ho-  
hen Schule/ wer aber dauon rede/ oder  
dergleichen Bücher habe oder wisse/ oder  
jemand aus denselben beherberget / vnd  
nicht viel mehr dieselben als bald vberge-  
be/ vnd die Lehr als Kezerisch verdamme  
vnd verschwere / Der solt als ein Kezer  
vnd Lutheraner / verbrennt / Vnd sein  
verlassen Gut / halb dem Doegitischen  
Berechter / vnd halb in die Kamer ver-  
wendet werden/ Alles darumb/ damit das  
leidige Papstumb/ mit allen seinẽ Grewel-  
en/ vnd ergerlichen Misbreuchen/ ohne  
verhinderung erhalten/ Vnd das heilige  
Euangelium/ von der Lehre des Glau-  
bens/ vnd rechten Brauch der Hochwir-  
digen Sacrament / ausgerottet vnd zu  
Grund verdilget werde. Also



Also besorget man das auff des Friderici  
Staphyli/der Jesuiten/vnd der blinden  
Geistlichen Papisten anregen/vñ getrieb  
des Teuffels ( vmb welcher bösen stück  
willen / freilich alle liebhaber Gotlicher  
warheit / beide syrer Lehr vnd Leben sol-  
ten abholdt sein / ) werde nicht allein ein  
schwerer vnbillicher Krieg vnd verder-  
ben / Sondern auch ein ernstliche Visi-  
tation der Euangelischen Bücher von  
den Antichristischen Dienern vnd Baals  
Pfaffen in Ihren Gebieten vñd Herr-  
schafften / von Newem fürgenommen / da  
denn nicht alte Pöpstische Seartecken /  
Sondern die schönen Postillen Doctor  
Martini Lutheri / D. Brentij / M. Jo-  
hannis Spangenbergi / Coruini / etc. item  
die schönen Catechismos / darinne die  
Summa reiner Lehr / auff's klarest / aus  
Gottes wort beschrieben / Fürnemlich die  
H. Bibel / Das ist / die Schrifften Alts  
vnd Newes Testaments / erfordert / vnd  
zuuerbrennen / vbergeben werden / denn  
der Sathan / vnd dieser Blutgierige Cai-  
nisch hauffen / welchen Davidt nennet  
Ecclesiam malignantium / Ist Gott vnd  
seiner



seiner heiligen Gemein so hold / das er  
nicht seyret noch ruget / biss er ( so viel  
an ihm gelegen ) die Personen veriaget  
vnd getödtet. Wie geschriben Matth. 23.  
Sihe ich sende zu euch / Propheten /  
Schrifftegelerten / vnd Weise Leute / euch  
zusamen / wie eine Henne ihre Jungen  
vnter ihre Flügel versamlet. Vnd die  
werdet ihr Tödtet / Geißeln / vnd Ver-  
folgen / von einer Stadt zur andern / auff  
das vber euch kome / alles das Gerechte  
Blut / so von Abel an / biss auff diese stun-  
de vergossen ist. Item / Stephanus wel-  
chen Propheten haben ewre Väter nicht  
verfolget / welche verkündiget haben / die  
Zukunft dieses Gerechten. Act. 6. Die  
wol angerichten Kirchen vnd Schulen  
zerrissen / die nützlichen Bücher verbren-  
net / vnd seine Delgöken wider eingeseht  
hat. Der H. Erre wolle ihm wehren / vnd  
ihm durch sein Wort in allen Landen / ei-  
ne reine Kirchen samlen / heiligen vnd er-  
halten / durch vnsern H. Erren Christum  
Amen.

Johan.  
17.

So denn den lieben Christen / eine sol-  
che Geistliche Rauberey zuerwarten / vnd  
dem



dem leidigen Papst nicht so viel Holz  
mehr vbrig ist / denn das er den Gleubi-  
gen zur Prob / vnd denn ihm vnd allen  
Gottlosen Verechtern / zur vnablässigen  
Straff / mit ihren Büchern / hie ein frew-  
den / vnd dort ein Ewig trawre Feuer / in  
allen Landen anrichten wil. So wil vns  
Christen nicht gebüren / einigen Buchsta-  
ben von heiliger Schrift / geschweig ganz-  
ke Herrliche Bücher / die ist am Tage /  
vnd vielleicht nimmer dergleichen an das  
Liecht komen werden / weil Gottes Wort  
ist wie ein Pliz vnd Liecht / so Heute da /  
vnd Morgen dort / vnd nicht allezeit an  
einem ort leuchtet / zu solchem schedlichen  
Brand / durch vns selbst zu vberantwor-  
ten: Sondern sollen dieselbigen mit Da-  
uid vber fein Gold lieben / Vnd mit den  
Bürgern zu Thessalonica / teglich in der  
Heiligen Schrift suchen / ob es sich also  
halte / wie skund von vielen fürgeben vnd  
gelehret wird. Actor. 17.

Vnd sonderlich sollen wir betrachten /  
das Christus sprich: Joh. 5. Suchet in  
der Schrift / denn ihr meint ihr habt das  
leben darin / Vnd sie istis / so zeugnis von  
mir



mir giebe / Das ist / Das Christus das  
Lemlein Gottes vmb vnser Sünde willen  
dahin gegeben / vnd vmb vnser Gerechtig-  
keit willen / widerumb vom Tode auffer-  
wecket / Johan. 1. Rom. 4. Vnd das er  
allein der Einige Mittler vnd Heylandt /  
vnd sonst kein Beck oder Liecht zum Hi-  
mel sey / Denn durch das vertrauen in sei-  
nem Namen. Solches Zeugnis würde als  
denn verdrückt / vnd der Weg zum Leben  
abgeschnitten / wenn du diese Mittel / Das  
ist / die H. Schrifft / auff das vnbilliche er-  
fordern / der Kezer vnd Brandt Meister  
( wie albereit von vielen geschehen ) So  
leichtfertig vberantworten woltest .

Die Juden ( wie Ezechiel 33. Cap.  
klagt ) waren zum theil böse Leut / Höreten  
Gottes Wort / vnd lebten doch fort nach  
ihrem Geiz. Noch hetten sie die Bücher  
der Propheten / für den Tyrannen behal-  
ten / Anderst sie hetten dem HErrn Chri-  
sto / den geschriebenen Propheten Esaiam /  
da der skunde in ihre Schule kam / nicht  
können fürlegen. Lucæ am 4.

Vnd am andern Buch der Machabe-  
er / im andern Capitel lesen wir : Das der  
B Pro-



Propheet Hieremias / zur zeit des Babilo-  
nischen Gefengnis / die Laden des Buns-  
des / darinne die Zehen Gebot des HERN  
lagen / in eine Höle verstackt / damit sie  
nicht von den Feinden des Göttlichen Ges-  
ses / geraubt vnd verbrennet / Sondern  
auff die nachkommen rein vñ vnuerfelschet /  
erhalten würden.

So den Jeremias das geschriebene Ges-  
ses also fleissig verwaret / wie viel mehr  
sollen wir Christen / die Bücher des Ne-  
wen Testaments vñ die ganken Biblischen  
schriffen verwaren / Darin nicht allein /  
das Geses / sondern auch das Heilige  
Euangelium verleubt ist. Wolte doch die  
Rahel ihren Vater Laban / die gestolen  
Götzen nicht wider geben / wie fast er sie  
auch suchet vñnd begerte Gen. 31. Vnd  
Naboth seinen Weinberck nicht vberant-  
worten / sonder er lies sich ehe darüber er-  
schlagen. 3. Regum. 21. Vnd du woltest  
dein Euangelij buch / darin der liebe Sohn  
Gottes wie ein köstlich Perlin in einer  
Muscheln verborgen ligt / so bald vberge-  
ben vnd verrathen / So doch hie nicht ein  
Göt oder ein stück acker / sonder der Brun-  
nen



nien des lebens von dir gefordert/ vnd vberantwort würdet. Warlich die solches so vnberechtigt vnd ohne hochdrenge Nott thun/bezeugen / das sie die heilige schrifft nie sonder geachtet/ Sondern dem Judæ Ischarioth/ in der art nach geschlagen haben/ der vmb eines kleinen Geldes willen/ seinen HErrn vnd Meister / den Hohenpriestern vnd Schrifftgelerten / verrathen hat. Also verbrennen vnd verrathen solche Mammelucken/ allein zu erhaltung eines zeitlichen Genusses / das Mittel / so Gott zu Erkenntnis seines gnedigen Willens gegen vns / vnd zu vnserm Heil / in dieser letzten zeit / verliehen hat. Es ist fürwar genug Das etwan für zeiten / in schweren Kriegsleufften / Als zu Alexandria / Vnd denn vnter dem Keyser Zenone / zu Constantinopel / durch Feuer vnd Brandt / etliche viel Hundert Tausent schöner Bücher / mit grossen Kosten vnd Fleiss / von den alten fromen Keysern vnd Königen erzeugt / Wie Herr Georg Lauterbeck / Mansfeldischer Cankler / in seinem schönen Regenten Buch / klar anzeiget / Also vnd dermassen zu Boden gangen / das man billich

Lib. 2.  
Cap. 8.

B ij in





in erhaltung der vbrigen Authorn / für/  
nemlich / der schönen Deutschen Biblien/  
Testamenten / Postillen / Catechismi / Psal  
men Büchlein / etc. Bessern fleiss anwen  
den / Denn also bald vnd leichtfertig vber  
antworten solt.

Wer aber solchen fleiss nicht anwen  
den / sondern diesen vnbillichen Gehorsam  
leisten / vnd beide ihme vnd seinen Kindern /  
oder Nachkomen / solchen edlen Schatz /  
Dagegen Sylber / Gold vnd Edel Ge  
stein / lauter Scherben / vbergeben wil /  
Der ist werd / das er nimmermehr kein  
rein Buch / sondern lauter Staphylischer  
Jesuitische / vnd Päpstische Lügen vnd  
Fabeln ( darvon Hr. Jeronimus Rausch  
er seliger / etliche Büchlein aufs ihren ei  
gen Scribenten zusammen gezogen / vnd  
in Druck gegeben ) habe vnd behalte / wie  
geschrieben stehet 2. Thessal. 2. Dafür /  
das sie die Liebe zur Wahrheit nit haben  
angenomen / das sie Selig würden / wird  
ihnen Gott kreffrige Irthumb senden / das  
sie glauben den Lügen / auff das gerichtet  
werden / alle die der Wahrheit nit glauben /  
sondern haben lust an der Vngerechtig  
keit.



Zeit. Item/ Amos am 8. Sihe/ es kömpt  
die zeit/ spricht der HERR: Das ich einen  
Hunger ins Landt schicken werde / nicht  
einen Hunger nach Brodt/ Sondern nach  
dem Wort des HERRn zuhören. Das sie  
hin vnd her/ von einem Meer zum andern/  
von Mitternacht gegen Morgen / umb-  
lauffen / vnd des HERRn Wort suchen/  
vnd doch nicht finden werden. Vnd solte  
doch hirinne/ die schuld nicht des HERRn/  
sondern dein selbst sein/ Darumb / das du  
das Wort gehabt/ aber so schendlich ver-  
stossen hast. Der HERR gebe / das die  
Schwachen erhalten / vnd nicht so blöde  
erfunden werden/ Amen.

Ja möcht einer hie sagen / Ich wolte  
gern an mich halten / wo ich nicht bey mei-  
ner Endspflicht/ alle Christliche Bücher  
herfür zutragen / angesprochen/ vnd darne-  
ben so hart bedrawet würde/ wo ich der eins  
oder mehr verhalte/ solte ich nach allen un-  
gnaden / an Leib vnd Gut gestrafft wer-  
den.

Hierauff mus ich dich wider fragen weiß  
dir gedachte Oberkeit/ bey einem End auff  
erleget / alle deine Gülden vnd Daler/ Ket-



ten vnd Kleider/ete. Herfür zutragen / da-  
mit sie öffentlich verbrent würdē. Du wür-  
dest trawen nicht so bald gehorsam Leisten/  
ob dir wol solch gezwungene vbergab / an  
deiner Seel heil/ nicht schadet sondern auff  
Mittel vnd Weg gedencen / damit du  
solchen Schatz/ beide dir vñ deinē Kindern  
vñ Nachkommen/ zu gutem erhalten kündest.  
Warumb bistu denn hie so willig vnd ges-  
horsam / da du doch/ wie oben auch zum  
theil gemeldet / nicht einen Becher / Gül-  
den/ oder Daler / Sonder einen solchen  
theil vbergiebest dadurch dir vnd deinē Kin-  
dern / vnd andern lieben Christen / in  
Ewigkeit het mögē gedienet werden. Sol-  
ten nicht hie alle Vnderthanen in einem  
ganzen Lande ( doch ohn alle enpörung )  
zusammen lauffen/ vñ demütiglich bitten/  
Das man ihnden Werckzeug daraus rech-  
ter Glaub vnd Gehorsam zulernen / nicht  
nemen / vielweniger verbrennen / sonder  
Günstiglichen lassen wolt. Aber da thut  
niemandt/ oder se der wenigst theil mit ernst  
darzu / alle fürchten sie die jenigen mehr/ so  
allein gewalt habē/ den Leib zu Töden/ vñ  
doch nicht eher noch lenger / Denn es Gott  
zuliest/



zulest / wie geschrieben stehet in Ecclesiasti-  
ca Historia Lib. 7. cap. 26. Nicht wens  
den Tyrannen gelüftet / werden wir ge-  
martert / sonder wens dem HErrn gefelt  
werden wir gezüchtiget. Item Math. 10.  
ewre Herlein / sind alle gezelet / vnd ohn den  
willen ewers Vates / solt euch keines ver-  
rückt werden / dann den / so zugleich Leib  
vnd Seel tödten vnd verdammen kan.

Es ist gleich in dieser sachen sehrlich  
vnd etwan bey den Tyrannen alles stehen  
vnd bitten vergeblich / jedoch weil das Herk  
des Königes / in Gottes Handt stehet /  
der es lencken kan / wo hin er wil. So solt  
man alles versuchen / was zu erhaltung  
dieser sachen dienstlich / Denn der Gott /  
so dem Keyser Constanti ein solch Herk  
geben / das er auff das demütigst vnd be-  
fendigst anhalten der Christlichen Katho-  
likawen zu Rom / iren vertrieben Bischoff /  
wider zugelassen. Tripartitæ Historiæ Lib. 5.  
cap. 18. Kan auch wol der Bischoff / oder  
sonst eines grossen Potentaten / arges für-  
nehmen / zum besten wenden.

Vnd gesetzt: Das sie / wie Pharao ver-  
herttet / vnd im wenigsten nichts zuerhalten

B iij were /



were / So solt man dennoch Nüssliche  
Bücher / in solcher Gestalt / nicht auff-  
opffern / Sondern mit S. Polycarpo ge-  
trost sagen: Wir werden gelehret / den Für-  
sten vnd dem Gewalt / der von Gott ist /  
Ehr zubeweisen / doch solche / die dem glau-  
ben nicht zuwider ist. Ecclesiast. Hist. Lib.  
4. Cap. 15. Item / mit Matathia zu Mo-  
din: Wenn schon alle Lender Antiocho ge-  
horsam weren / vnd jederman abfiel / von  
seiner Väter Gesetz / vnd willigeten in des  
1. Nach Königes Gebot / So wollen doch ich / vnd  
abeor . 2 meine Söhne vnd Brüder / nicht vom Ge-  
setz vnser Väter abfallen. Da sey Gott  
für / das were vns nicht gut / das wir von  
Gottes Gesetz vnd Wort abfielen.

Gleichwol solt man auch dis wissen /  
das ich mit dieser meiner getrewen War-  
nung / die Bücher der Sacramentschwer-  
mer / Widerteuffer / Schwencfelder / der  
Papisten / vnd andere schmehe vnd lester  
Schriften / dadurch das Verdienst Chri-  
sti / die Lehre vom Glauben / vnd Hoch-  
würdigen Sacramenten / etc. Verlestert  
wird / im wenigsten nicht wil gemeint / viel  
weniger vertheidiget haben. Denn diese  
all



alle/sollen nicht allein verboten sein/ Sondern auch auff das Erfordern/ ja wol freywillig/ als ein Verdorbener/ Vnnützer Schatz/ der Obrigkeit vbergeben/ vnd verbrennd werden. Denn also list man Actorum am 19. Viel aber die da fürwitzige Kunst getrieben hatten/ brachten die Bücher zusammen/ vnd verbranten sie öffentlich/ vnd vberrechneten/ was sie werd waren/ vnd funden des Geldes Funffzig Tausent Groschen/ Das ist/ vber Sechshalb Tausent Gilden. Also Wechtig wuchs das Wort des HERRN/ vnd nam vberhand. Denn die lieben fromen Christen/ haben wol verstanden/ was böse vnd vnnütze/ das mans vnuorzüglichen hinweg thun/ vn der Jugend keinen bösen Anstoss vorlassen solt/ wie man in der Kirchen Cronicken list. Das die fromen alten Keyser/ die Vestigia der Bösen Heuser/ so gar hinweg gethan/ damit die Nachkommen nicht vrsach hetten/ den rechten Gott zuuerlassen/ vnd allerley Grewel zutreiben. Sondern ich rede vnd rahte/ von reinen rechtgeschaffenen Büchern/ darin/ wie oft gesagt/ die Summa vnd Bekent-

B v nis



nis vnfers H. Glaubens/ vnd andere nütze  
liche Künste verfasst sind/ die solt man er  
halten so lang man kan / vnd nicht vberant  
worten / biss das sie es auff vnser Bekent  
nis / wie die Rauber / selbst nemen / wie  
man liest/ das man zur zeit Diocletiani des  
Kensers / gethan hat. Da spricht Eusebia  
us: Es ist je vbel mit vns gestanden / Da  
man vns die Kirchen biss auff den boden  
hat abgebrochen/ vnd die Heilige Schrifte  
mitten am Weg verbrent/ wie wir das Ley  
der mit vnsern Augen gesehen haben/ in Ec  
clesiast. Historia. Lib. 8. cap. 1. Da heist es  
als denn/ wie wir im Psalm singen / Ne  
men sie den Leib / Gutt / Ehr Kinde vnd  
Weib / Lass fahren dahin / sie haben klein  
Gewin / das Reich mus vns doch bleiben.

Das also ein Christ seine Nütliche  
Bücher / da man ihn derhalben fraget/ wie  
seinen Glauben selbst / öffentlich vnd one  
schew bekennen solt / damit man sehe vnd  
höre/ aus was Mittel oder Brunnen / er  
seinen waren vnd allein Seligmachenden  
Glauben habe. Nemlich nicht aufs dem  
Vlspiegel Discipulo, Dormi secure, &c.  
Sondern aus den Büchern der Prophe  
ten/



ten/Euangelisten/vñ ander getrewer Apo-  
stolischer Lehrer/ die auffo getrewlichst von  
Christo gezeuget/vñ mit grosser mühe vnd  
widerstandt/ vns solche Bücher verlassen  
haben. Hat vns nicht S. Paulus/ viel fei-  
ner herrlicher Episteln vbergeben: Dñ  
was Petrus/ Johannes/etc. gethan/ der wir  
je noch heut geniessen/ vnd alle gute vnter-  
richt daraus nemen müssen. Soltens der-  
halben die Alten/ so es mit grossen danck/  
von gedachte Aposteln empfangen/ vñ her-  
nach der Christliche Kirchen befohle habē/  
die es den aus verleihung des Almechtigen/  
bisher erhalten/ jederzeit da sie die Tyrans-  
nen begerten/ herfür getragen vnd nicht  
viel mehr verwart haben / So wüsten wir  
von Christo vnd vnser Seele heil / das je-  
nige nicht / das wir Gott lob / nue mehr  
wissen vnd bekennen / denn wir ja zu ihrer  
zeit nicht gelebet / noch viel weniger ihre  
Mündliche stim gehöret / sondern alleine  
wie gesagt / ihrer nachgelassen Bücher  
vnd Schrifften / genossen haben. Also  
würden auch vnser Nachkomen einen  
mercklichen schaden leiden / vnd derwe-  
gen vber vns zuflagen haben/ wenn wir so  
viel



viel feiner Bücher / die wir aus milten dar-  
reichung / von vielen gutt Gelerten Men-  
nern empfangen / vnd doch vmb Got nicht  
verdiene / viel weniger nue von Herken  
dafür gedanckt / oder vns daraus gebessert  
haben / so feiger vnd verzagter weis / solten  
vberantworten. Es were besser / das wir  
niemalen keine empfangen / denn einen sol-  
chen schendlichen nachklang / verlassen sol-  
ten. Darumb hab ich gesagt / das wirs be-  
kennen / aber nicht vberantworten sollen /  
es were denn / das ein Oberkeit / guter  
meinung darin lesen / vnd die Summa vn-  
ser Religion / daraus erlernen wolt / das  
geschicht aber zu vnsern zeiten selten. Sol-  
ten derhalben thun / wie die fromen besten-  
digen Judē zur Machabeer zeit gethan ha-  
ben / Da nue Jerusalem wüst / vñ das Hey-  
ligumb mit dem Gōken entheiliget / vnd  
alle heiligkeit von Jacob auffgehoben / vnd  
nicht mehr so viel sicherheit war / das man  
das Ges. des HERRN / dem volck für-  
lesen möcht / Da kam alles Volck gen Mis-  
path / gegen ihren Salen vber / Den Isracl  
musste für zeiten zu Mispath anbeten. An  
diesem ort kamen sie jzt auch zusammen /  
fasteten

1. Mach  
abeo. 3.



fasteten da / vnd zogen Seck an / streweten  
aschen auff ihre Heubter / vnd zerrissen ihre  
kleider / vnd trugen herfür ihre Bücher  
des Gesekes / welche die Heiden suchen  
liessen / ihre Götzen darein zuschreiben /  
vnd zu malen. Sie brauchten auch dahin  
ihre Priesterliche kleider / die erstling vnd  
zehenden / vnd machten Nazareos / welche  
ihre bestumbte zeit halten mussten / vnd schrie-  
en kleglich gen Himmel / wo sollen wir diese  
hinführen / denn dein Heiligtumb ist verun-  
reiniget / deine Priester sind veriagt / vnd  
sihe alle Heiden empören sich wider vns /  
das sie vns ganz vertilgen. Du weißt / was  
sie wider vns im sin haben / wie können wir  
für ihnen bleiben / du helffest vns denn vn-  
ser Gott. Also sollen wir nicht allein vnser  
Gutt / sondern auch vnser Bücher ver-  
waren / vnd nicht zugeben / das sie aus vn-  
serm bewilligen oder zuthun / von Türcken  
Heiden oder Papisten / solten zerrissen / ver-  
wüestet oder gar verbrennet werden / wie  
wir denn lesen. Das (aber wider ihren wil-  
len) beide des Johanni Hussen zu Cost-  
nik / vnd denn D. Martini Lutheri schön-  
ne Bücher / von den Papistischen Pfaffen /  
mit



mit gewalt verbrent/ ob wol Seithero viel  
andere vnd Herlichere / an der Stad sind.  
Also wolt auch der wunderbarlich Eusebi-  
us die verzeichnete Bekentnis Molitij/  
nicht von sich geben / ob sie wol von dem  
Keyser durch ein eilende Post/mit grosser  
bedrewung / von ihm gefordert ward / Ja  
er wolt ehe seine beide Hent verlieren/denn  
das jenige/ so ihm vertrawet/ vberantworten.  
Tripartita Historiæ Lib. 5. cap. 49. Doch  
solt man auch dis wissen / wenn gleich je-  
mand seine Bücher heimlich halten / vnd  
doch in des beide Bücher vñ wort Gottes /  
für den Tyrannen verleugnen wolt / wie  
man manchen findet / der schweret einen  
guten Eyd / das er kein solch Buch nie ge-  
lesen / noch viel weniger von dieser verbo-  
ten lehr / ein wissen hab / der thete eben /  
als der erstlich Christi des HERN/ vnd  
darnach der Krippen zu Bethlehem / da-  
rin gedachter sein Herr zu suchen/ Ver-  
leugnen wolt / würde derhalben das er-  
schreckenlich vrtheil / auff sich laden / da-  
von im Luca geschriben cap. 9. Wer sich  
meiner vnd meiner wort schemet / des wird  
sich des Menschen Schon auch schemen /  
wenn



wenn er komen wird in seiner Herligkeit.

Daher denn der Gottselige Keyser Con-  
stantinus der Elter / alle die von seinem  
Hoff abschaffet / so auff sein begeren / das  
ihm (doch nicht ernst / denn er allein ihre  
bestendigkeit probieren wolt) den Christli-  
chen Glauben verleugneten / da er sich  
doch nur also stellet / als wolt er alle die be-  
halten / so den Abgöttern opfferten / aber  
er thet das widerspil / wie in Tripartitæ Hi-  
storiae Lib. 1. cap. 6. zusehen ist / Denn er  
gedacht / vñ ist auch war / der seine Gott im  
himmel freuenlich verleugnē darff / der darff  
auch seinen Oberherrn verleugnen / vñ ver-  
rahten / wie in gedachter Tripartitæ Histo-  
riae Lib. 10. cap. 31. weiter zulesen ist.

Darumb seid bestendig vnd getrost / vnd  
wisset / wenn gleich etlichen auch euch ire  
Bücher genomen / vnd gar verbrent wer-  
den / das es ihnen doch nicht solt schaden /  
sondern eben ein ding werden / wie mit Joa-  
kim dem Könige Juda. Der zerschneid /  
vnd verbrennet / kurz für dem Babyloni-  
schen gefengnis / vnd zerstörung Jerusa-  
lem / das schöne Buch welches Jeremias  
der Prophet des HERRN / gemacht / vnd  
Baruch



Baruch vor allem Volck gelesen hatte /  
Jerem. cap. 36. Denn er kunde nicht hö-  
ren / wie mans auch ist nicht wil leiden /  
das man ihm die Busspredigen / vnd den  
vntergang seines strefflichen Landes / so  
offentlichen verkundigen solt / aber er er-  
hielte mit solchẽ vn Sinnigen verwüsten mer  
nicht / denn das der gefangen Jeremias /  
aus Götlichem Befehl ein ander Buch ne-  
men / vnd Baruch der schreiber / nicht als  
lein alle vorige wort / so im Ersten Buch  
stunden / darein schreiben / sondern auch  
dieses darzu setzen muste.

So spricht der HErr / du hast dieses  
Buch verbrent / vnd gesagt / warumb  
hastu drein geschrieben / das der König von  
Babel werde komen / vnd diss Land verder-  
ben / vnd machen / das weder Leute noch  
Vieh drinnen mehr sein werden. Darumb  
spricht der HERR von Joackim dem Kö-  
nige Juda / Es sol keiner von den seinen  
auff dem Stuel David sitzen / vnd sein  
Leichnam sol hingeworffen / des Tages  
in der Hitze / vnd des Nachtes in der Frost  
liegen. Vnd ich wil ihn vnd seinen samten  
vnd seine knechte heimsuchen / vmb ihrer  
Missethaten



Missethat willen / Vnd ich wil vber sie  
vnd die Bürger zu Iherusalem / Vnd  
vber die in Juda komen lassen / alle das  
Vnglück / das ich ihnen geredt habe  
vnd doch nicht gehorchen.

Doch ist kein zweiffel / Gott werde  
Elnathan / Delaia / vnd Gemaria / wel-  
che den König baten / er wolte das Buch  
nicht verbrennen / ob er ihnen wol nicht  
gehorchet / Sondern auch beide nach  
Jeremias vnd Baruch trachtet / sie zu  
greiffen / In dem künfftigen Vnglück  
erhalten / oder zum wenigsten ihre straffe  
gelindert haben / Wie man liest: Das  
er Ebedmelech dem Moren / vnd Kem-  
merer des Königes von den Feinden  
geholfen / darumb das er sich des armen  
Gefangnen / Jeremia so trostlich ange-  
nomen / vnd ihn aus dem schlam errettet  
hat. Jerem. am 36. vnd 38. Cap.

Also kan vnd wird noch jzt gesche-  
hen / das Gott der HERR nicht allein  
die jenigen / so vnser ware Religion / Das  
ist / Lehre vnd Bücher / mit gefahr ihres  
Lebens vortheidigen / vnd den Ketz-  
meistern / laut ihrer Pflicht / Mündliche  
E vnd



vnd ernstliche einhaltung thun / werde  
widerümb mit Gnaden bedecken / wie  
er vermelten Ebedmelech / Vnd denn  
auch den Hauptman Achior / welcher  
für die Belagerten Bürger vnd Jüden /  
zu Bethulia / für den Heydnischen Krie-  
gesfürsten / mit gefahr seines Lebens /  
das beste geredt / mit Gnaden vnd Trost /  
bedacht hatte. Judith Cap. 5. vnd 14.  
Sondern auch also Vorsehung thun /  
Das wo man jzt ein einige Bibel / Te-  
stament / oder Postilla / Tyrannischer  
weise raubet / zerschneidet / oder gar ver-  
brennet / wie im Papstumb geschehen /  
vnd jzt von Newen im Lande zu N.  
mit den armen Pfarherrn vnd Bürgern  
im Werck ist / Das etliche viel Hun-  
dert an Stadt komen / vnd solche Got-  
tesdiebe ( darinnen auch die schendlichen  
Jesuiten begriffen / welche dieses Spiel  
am meisten treiben ) mit einem vnaus-  
löschlichen Feuer / Wenn der HErr  
in kürz von Himmel wird. Nach vben /  
soltent verzeret werden.

Also habt ihr nun auff's kürkste /  
Meine lieben Christen vnd Brüder im  
HErrn /



HERRN/ Wie ihr euch solt verhalten/  
wenn des Papssts Heneker / Ketzler vnd  
Brenmeister / im Lande umbziehen / vnd  
nicht allein die armen Christen Exami-  
niren / oder viel mehr Verpiren / Spot-  
ten / Verachten vnd Verfolgen. Son-  
dern auch nach dem Exempel der obge-  
dachten Heidnischen Keyser / vnserm  
HERRN zu Lob / vnd dem Hellschen  
Vater Papsst zu Ehren / Die herrlichen  
vnd schönen Bücher / Die / wie oben ge-  
sagt / mit keinem Gelde zu bezalen / mit  
Gewalt fordern / vnd damit einheizen /  
oder dem Cloack zu eignen / vnd dage-  
gen ihre verderbliche Scartecken vnd  
Lesterschriften / den armen Kirchen  
vnd Schulen / auffdringen werden.  
Das ihr als denn / vnd zwar auch ist /  
wol ewre Mündliche / reine Bekentnis  
thun / vnd im wenigsten nicht wancken /  
viel weniger verleugnen solt / Wie Da-  
uid auch sagt: Ich scheme mich nicht /  
von deinen Gezeugnissen zureden / vor  
Königen vnd Fürsten. Vnd Paulus  
Romanorum 10. Mit dem Herzen  
glaubt man zur Gerechtigkeit / Aber mit  
E ij dem



dem Munde geschicht das Bekenentis  
zur Seligkeit. Vnd der Engel im Lo-  
bia: Könige vnd Fürsten Rath ( ver-  
stehe/ wo die nicht wider Gott vnd sein  
Gemein sind ) solt man verschweigen/  
aber Gottes Wort vnd Werck / solt  
man bey jederman / Darumb das man  
GOTT mehr Gehorchen soll / denn  
dem Menschen/ herrlich offenbaren/ vnd  
preysen. Aber doch nicht eine Sylben  
von heiliger Göttlicher Schrifft/ vber-  
antworten/ Sondern auff die Nachfo-  
men verwaren solt ( wie auch die Jüden  
vnter Manasse / biss auff Josiam / das  
Gesezbuch im Hause des HERRN / ver-  
waret/ vnd zu seiner zeit/ widerumb her-  
für gezogen/ vnd ermelten König Josia/  
darinne zulesen vberantwort haben. 2.  
Regum cap. 22. ) Vnd den vnbilligen  
Heidnischen Gewalt / in aller Gedult  
dem allein Obersten vnd Gerechten  
Richter befehlen / vnd eines gnedigen  
Ausganges erwarten / Das ist / Das  
Fünffte Capittel im Buch der Weis-  
heit/ fleißig vnd wol lesen solt. Da also  
stehet: Als denn wird der Gerechteste  
heh/



hen / mit grosser Freydigkeit / wider die /  
so ihn geengstet haben / vnd so seine Ar-  
beit ( das ist schreiben vnd predigen ) ver-  
worffen haben. Wenn dieselbigē denn sol-  
ches sehē / werdē sie grausam erschreckē /  
für solcher Seligkeit / der sie sich nicht  
versehen hetten / vnd werden vnter ein-  
ander mit Rew / vnd für Angst des Gei-  
stes seuffzen. Das ist der / welchen wir  
etwan für ein Spot hatten / vnd für ein  
höhnisch Beyspiel. Wir Narren / hielten  
sein Leben für vn sinnig / vnd sein Ende  
für eine Schande / Wie ist er nu gezelet  
vnter die Kinder Gottes / vnd sein Erbe  
ist vnter den Heiligen. Darumb so haben  
wir des rechten Weges gefeilet / vnd das  
Liecht der Gerechtigkeit hat vns nicht  
geschienen / Vnd die Sonne ist vns  
nicht auffgangen. Wir haben eitel vn-  
rechte vnd schedliche Wege gegangen /  
vnd haben gewandelt wüste Wege / aber  
des HERRN Wege haben wir nicht  
gewusst. Was hilfft vns nu der Pracht  
Was hilfft vns nu der Reichthumb /  
samt dem Hochmut? Es ist alles dahin  
gefahren / wie ein Schatte vnd wie ein  
Ges



Geschrey das für vberfehret / etc. Der  
Allmechtige **G D E** vnd Himlische  
Vater / welcher den Alten Büchers  
Feinden Gewaltiglich gewehret / vnd  
alle zeit reine Lehrer vnd Bücher / auch  
mitten in Babylonien vnd der Türcken /  
aus Gnaden gegeben vnd erhalten hat /  
Vnd noch weiter geben vnd erhalten  
wird / vnd solt es dem Teuffel leid sein.  
Der wolle auch diesen wehren / vnd vns  
schier ein mal / Ewig Selig ma-  
chen. Durch vnsern **H E R R N**  
**J H E s u m** Christum  
**A M E N.**





Uctor. Cap. 5.

Ist der Rath oder das Werck  
aus dem Menschen / so wirds  
vntergehen. Ist aber aus Gott  
so können ihrs nicht dempffen/  
Auff das ihr nicht erfunden wer-  
det / als die wider Gott streiten  
wollen.

Matth. Cap. 23.

Wehe euch Schriftgelerten  
vnd Phariseer / Ihr Heuchler /  
die ihr das Himmelreich zuschlies-  
set / für den Menschen / ihr kompt  
nicht hinnein / Vnd die hinnein  
wollen / lasset ihr nicht hinnein  
gehen.





Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.





44  $\frac{6}{10}$

X 198 6463





FORMAPHIIPPEI VAESTI EDMES  
IVANESCIAPINGI NOTAESTAN  
TE BONISECV SCRIPTA DOCENT

90

Handwritten text on a small white label on the right edge of the book cover.







Inches  
1  
2

Centimetres  
1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

**Ein kurzer vnd  
getrewer warnügs Brieff/  
an die fromen vnd recht Euan-  
gelischen Christen/ vnter dem leidie-  
gen Papstumb / das sie die reinen  
Euangelischen Bücher nicht sollen vberants  
vorten/ ob mans gleich mit ernst von ihnen  
erfordert. Geschrieben / durch Thomam Kos-  
rarium/Pfarherr zu Reinhartzhofen/in  
der Pfaltz/Anno Domini/  
1566.**

**Ecclesiastica Historia, Libro 8<sup>o</sup>  
Cap. 1.**

Es ist je vbel mit vns gestanden / da man  
vns die Kirchen bisz auff den Boden hat ab-  
gebrochen / vnd die Heilige Schrift mitten  
am Weg verbrend / wie wir das leider mit vns  
fern Augen gesehen haben/etc.

**Gedruckt zu Eisleben / durch  
Andream Petri.**

**M. D. LXVII.**